

lis Gnovis

■ UDIN. Personis cun disabilitâts e bens culturâi

Si varà timp fintremai ai 30 di Avost par prenotâsi (cuntune letare eletroniche, a la direzion sabap-fvg@beniculturali.it) pe rassegne di videos e di curtmetraçs «Propit li, devant di me», inmaneade de Sorintendence regionâl Archeologjie, Bielis arts e Paisaç, di chê strade de «Zornade internazionâl dai dirits des personis cun disabilitâts», ch'è colarà ai 3 di Dicembar cu ven. La partecipazion e je libare e gratuite. A podaran notâsi autôrs di bessôl o grops, ents e clapis. I videos, cu la presentazion di un ben culturâl, no varan di superâ 4 minûts. L'iniziativa e smire di valorizâ il patrimoni locâl, svilupant une riflession su lis dificultâts di acês a la culture. I prodots ricevûts a saran valorizâts cuntune presentazion, intant des manifestazions dal mê di Dicembar.

■ UDIN. Furlan pe zoventût



Il Centri interdipartimentâl pal svilup de lenghe e de culture dal Friul dal Ateneu regionâl (www.cirf.uniud.it) al torne a organizâ il cors di lenghe e di culture furlane par students universitaris e par zovins interessâts. La prime lezion e je stabilide ai 30 di Avost. Il cors al larà indenant ogni lunis e miercus, di 15.30 a 18.30, fint ai 20 di Setembar, li de Sale Gusmani di Palaç Antonini (a Udin, te strade Tarcisio Petracco), ma si podarà seguî lis lezions ancje mediant de plateforme informatiche «Microsoft Teams». Par informazions si à di clamâ il «Cirf» (0432 556480 - sportel.furlan@uniud.it - pagjine Facebook Uniud par Furlan).

■ CULINE. Puzzle cjargnel



La sezion «Talent collection» dal innomenât produtôr todesc d'imprescj didatics e di zûcs «Ravensburger» (fondât dal 1883 di Otto Maier) e à sielzûte une foto di Paola Toniutti di Codroip par produci il «puzzle» dedicât al lâ di Bordaie, su lis monts parsore Fors e Avoltri (www.ravensburger.org/it/prodotti/puzzle/puzzle-da-adulti/talent-collection-lago-bordaglia-friuli-venezia-giulia-16781/index.html). Il zûc par grancj al à mil tocots e si cjatilu ancje li dal Ripâr alpin dal Consort di Culine «Tolazzi», da pit de mont Coliâns.

Joibe 26	Madone di Czestochowa	Lunis 30	S. Faustine v.
Vinars 27	S. Moniche vedue	Martars 31	S. Aristit m.
Sabide 28	S. Ustin v.	Miercus 1	S. Egjidi
Domenie 29	Martueri di S. Zuan	Il timp	Bielis zornadis



Il soreli
Ai 26 al iève aes 6.20
e al va a mont aes 19.57.



La lune
Ai 30 Ultin cuart.

Il proverbi
Al nas ce che si semene.

Lis voris dal mê
Al è il moment di semenâ carotis, spinazis, fenoi, cicorîs, selino, rucule e la ultime indivie.

Cambiament e sperance

Cors di formazion ecologjiche par Parochiis e comunitâts

«Lis nestrîs Comunitâts, religiosis e laichis, orientadis da la bussule de «Laudato si'» e di «Fratelli tutti», a puedin diventâ testimonis e promotôrs di une culture gnove e fariis di un pinsîr gnûf e dal mudament sociâl e economic necessari pe curie dal creât e dai malans sociâi causonâts di sistemis ch'a multiplichin esclusion e disugualiance. L'Ecologjie integrâl e po diventâ il cûr dal svilup sostenibil, te sfere globâl e in chê locâl, biel partint des nestrîs Diocesis, tes nestrîs Comunitâts e sui nestrîs teritoris»: a son chestis lis peraulis che «Focsiv», «Caritas Italiana» e «Fondazione Lanza» a àn sielzût par presentâ il Cors di formazion par Comunitâts e Parochiis «Vivi l'Ecologjie integrâl tes Diocesis e sui teritoris». La scuele par «animadôrs, operadôrs, predis, guidis spirituâls, zovins impegnâts, fradis e sûrs bogns di olsâ, imparant a doprâ imprescj ch'a puedin judâ te conversion ecologjiche personis e Comunitâts», e larà indevant dai 13 di Setembar ai 22 di Novembar, insiorant dut il «Timp dal Creât», cuntun program di dis «webinar». I prins doi apontaments a coventaran come jentrade teologjiche, etiche e pastorâl su l'Ecologjie integrâl («De Ecologjie integrâl de Laudato si' al amôr politic de Fratelli tutti» e «Dut al leât: Ecologjie integrâl e svilup sostenibil tes Comunitâts e sui teritoris»). Chês altris vot convignis a profundissaran lis dimensions de Ecologjie integrâl



La foto di Henrique Oliveira sielzude par ilustrâ il Cors «viers l'Ecologjie integrâl»

Une propueste par animadôrs, predis, guidis spirituâls, zovins impegnâts ch'a vuelin imparâ a doprâ imprescj ch'a judin te «Conversion ecologjiche»

– naturâl, economiche, sociâl, culturâl, politiche, umane, globâl –, partint ogni viaç cuntune riflession pastorâl ispirade dal Magjisteri, lant indevant cuntune relazion gjenêrâl, par finile rifletint sun dôs esperiencis di studiâ come spiei par inviâ percors positîfs ancje in Comunitâts e teritoris diferents. Come relatôrs, si daran la volte il diretôr di «Caritas Italiana», Francesco Soddu, e i presidents di «Focsiv», Ivana Borsotto, e di «Fondazione Lanza», Lorenzo Celi; pre' Bruno Bignami dal Uffici de «Ceî» pai problemis sociâi e dal lavôr e pre' Joshtrom Isaac Kureethadam dal Dicasteri vatican pal Svilup uman integrâl; i professôrs universitaris Marco Marchetti, Leonardo Becchetti e Giuseppe Mangano; e i esperts di clapis e di istituzioni ch'a colaborin te organizazion («Asvis», «Global catholic climate movement», «Retinopera», «Next Nuova Economia per Tutti», «Progetto Bene 2.0/Coop. 5 Talenti», Glesie valdese di Milan,

«Progetto Diaconia», «Sermig», «Astelav», «Rete dei Piccoli Comuni del Welcome», «Officine sperimentali aree interne», Parochie «Redemptoris Mater» di Cinisi, «Refettorio Ambrosiano», «Fra' Sole», Diocesi di Acerra, «Monastero di Siloe», «Associazione Nocetum». Tescj di riferiment pai arlêfs a saran: «La guida per comunitâ e parrocchie sull'ecologia integrale 2020» di «Focsiv» (<https://lavoro.chiesacattolica.it/guida-per-lecologia-integrale-2020/>); il manûâl «Territori Civili. Indicatori, mappe e buone pratiche verso l'ecologia integrale», par cure di «Caritas» e di «Legambiente»; e il rapuart «I territori e gli obiettivi di sviluppo sostenibile», prontât de aleance pal svilup sostenibil «Asvis». Par podê seguî il cors, si varà di dâsi in note dentri dai 31 di Avost, doprant la schede eletroniche proferide tal lûc internet <https://forms.gle/Pmypo2mCoA3hNX8E7>.

Mario Zili

Peraulis in dismentie

par cure di Mario Martinis

SBROVÂT

agg. = scottato
(dal verbo sbrovâ "immergere una cosa nell'acqua bollente; riscaldare qualcosa al punto in cui scotta")
Il lidric sbrovât cuntun fil di vueli al è scuisit.
Il radicchio scottato con un filo d'olio è squisito.

SBRUDIE

s.f. = brodaglia
(da brût "brodo", con la s- rafforzativa)
La mignestre e jere propit une sbrudie.
La minestra era proprio una brodaglia.

SBURTÂ

v. = spingere
(probabilmente da collegare al celtico-romanzo *hurtare, da un francone *hurt con s- rafforzativo)
Judimi a sburtâ il cjar sot la arie.
Aiutami a spingere il carro sotto l'aia.

SCARMULIN

agg. = esile, sottile, minuto
(forma diminutiva di scarm "scarno, di membra snelle", dal latino parlato excarnare "scarnare", composto da ex- e caro "carne")
Ce scarmulin chel frut! Mangjal!
Che esile quel bambino! Mangia!

SCARSANALI

s.m. = scheletro, carcame, tutte le ossa di un animale
(probabilmente nasce dall'incontro del latino excarnare e carcame "insieme delle ossa di un animale morto", a sua volta forse da arcame, incrociato con caro "carne", con influsso semantico del latino capsum "cassetta del carro" dalla quale deriva anche la parola in italiano antico casso "parte del corpo, chiusa dalle costole")
A àn puartât il scarsanali de bestie inte discjarie diferenziade.
Hanno portato lo scheletro dell'animale nella discarica differenziata.